

四庫全書

子部

欽定四庫全書

子部

山堂肆考卷二百三十五

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣陸 湘

謄錄監生臣周世燦

欽定四庫全書

山堂肆考卷一百三十五 明 彭大翼 撰

謚法

制謚

趙忠獻

趙普字則平幽州薊人宋太祖受禪普有佐命功授諫議大夫乾德元年同平章事太宗雍熙中兼中書令封真定郡王後又封韓王謚忠獻

張文定

張齊賢字師亮宋太宗雍熙三年知代州敗走契丹以書生而閑軍旅之事史臣比之虞詡不十年遂拜相謚文定

宋惠安

宋琪幽州人太祖時為左補闕太宗時同平章事謚惠安琪有文學尤通吏術

任恭惠

任布字應之宋河南人後唐宰相園四世孫累官至樞密副使以太子少保致仕始布歸洛中作五知堂謂知恩知命知道知足知幸也謚恭惠子遜

曹武惠

曹彬字國華靈壽人佐宋太祖開國為樞密使相真宗朝拜同平章事彬位兼將相不以等威自異不名下吏每白事必冠而後見居官俸入給宗族仁恕清慎能保功名贈濟陽王謚武惠父芸成德軍兵馬使三子瑋琮

璚繼領旄鉞故陶弼詩蒐兵四把降王縛教子三登上
將壇

潘武惠

見功臣

畢文簡

畢士安字仁叟代州雲中人宋景德中與寇準並為相
準好使氣用公重德鎮之及卒上謂準曰畢士安君子
人也飭躬慎行有古人風賜其家白金五千兩謚文簡

子世長以耆年掛冠與睢陽五老會

李文靖

李沆字太初宋太宗雍熙中命中書召試除知制誥嘗侍宴上目送之曰李沆風範端凝真貴人也真宗咸平初拜相卒贈太尉中書令謚文靖

呂正惠

呂端字易直宋太宗初欲相之或言端為人糊塗帝曰端小事糊塗大事不糊塗決意用之至道元年拜同平

章事量寬恕知大體帝每見其入對肅然拱揖不以名呼又以端姿儀環大宮庭陞峻特令梓人為納陞謚正惠父琦孫誨

張忠定

張詠字復之登太平興國八年第嘗曰吾榜得人最多謹重雅厚無如李公沆深沈有德無如王公旦面折廷諍無如寇公準當方面之位詠不敢辭詠為人個儻有大志尚氣節自號乖崖公謚忠定

王文正旦

王旦字子明相宋真宗於景德祥符間享福祿榮名者
十有八年及卒遺令削髮被緇以斂蓋悔其不諫天書
之失也諸子欲奉遺令楊億以為不可乃止謚文正父
祐三子雍冲素

王文正魯

王魯字孝先眉目如刺畫弱冠三試皆首冠仁宗朝拜
相時莊獻太后臨朝魯正色危言能使宦官不敢窺覷

而仁宗君德日就莊獻亦全令名封沂國公謚文正

寇忠愍

寇準字平仲華州下邽人宋真宗朝與畢士安並大拜
決策親征成澶淵之功後頗自矜上用王欽若譖罷知
陝州既而復相又用丁謂譖罷知相州復貶道州司馬
雷州司戶叅軍雖有直言之風而乏包荒之量卒使生
竄南裔勲業不克令終而卒仁宗朝贈中書令封萊國
公謚忠愍無子以從子隨為後

呂文穆

呂蒙正字聖功太平興國二年進士第一淳化咸平中
凡兩人相封許國公祥符間卒謚文穆父龜圖起居郎
子居簡龍圖直學士

向文簡

向敏中字常之開封人宋太平五年試春雨如膏賦蘇
易簡榜及第真宗朝拜相端重沈毅識大體善處繁劇
時以厚德目之謚文簡子傳正傳式傳亮傳範亮子涇

涇女為神宗欽聖皇后

張文節

張知白宋仁宗朝拜相慎名器抑僥倖每以盛滿為戒
雖貴顯清約如寒士謚文節

張文定

張方平字安道少穎異凡書一覽終身不再讀宋綬蔡
齊以為天生奇才共以茂才異等薦之宋慶厯初上平
戎十策熙寧中叅大政謚文定與張齊賢同子恕

呂文靖

呂夷簡字坦夫宋仁宗朝大拜時章獻太后臨朝十餘
年間天下晏然皆其力也上嘗書方正忠良四字賜之
獨建募萬勝軍加契丹歲幣大為後日之患又成郭后
之廢遂孔道輔范仲淹於外時論少之封許國公謚文靖
祖龜祥即龜圖弟父蒙亨即蒙正弟子五人公弼公著
公奭公孺公綽

李文定

李迪字復古濮州鄆城人嘗從种放學宋景德初試天道猶張弓賦舉進士第一天禧中與王沂公繼秉鈞軸後與子東之皆早年告老時以方漢二疎謚文定

魯簡肅

魯宗道字貫之亳州人宋真宗朝與劉暉同為右正言後拜諫議大夫叅大政人目為魚頭公又曰魚頭叅政因其姓且言其骨鯁如魚頭也謚簡肅

宋元憲

宋庠字公序初名郊宋仁宗命改今名開封雍丘人與弟祁齊名後並入翰苑以詩賦為學者所宗嘉祐中拜相封莒國公治平中封鄭國公謚元憲

宋景文

宋祁字子京父玘為應山令夢人遺文選一部而生故小字選郎宋仁宗朝知成都帶修唐書以翰林承旨召還書成進工部尚書謚景文

杜正獻

杜衍字世昌初知乾州改知鳳翔慶厯中大拜務裁抑
僥倖每有內降率寢不行號清白宰相封祁國公謚正
獻

狄襄武

狄青字漢臣汾州西河人宋仁宗時夏元昊叛擇衛士
徙邊以青為延州指使青勇於臨敵常為先鋒前後二
十五戰中流矢者八每戰飾以銅面具夏人望之如神
以功遷秦州刺史涇原路總管謚襄武兄素子諡

包孝肅

包拯字希仁合肥人宋仁宗嘉祐中嘗知開封府為人
剛正貴戚宦官皆為斂手聞者憚之以其笑比黃河清
童稚婦女亦知其名呼為包待制京師語曰關節不到
有閻羅包老後除諫議大夫御史中丞遷禮部侍郎樞
密副使卒贈禮部尚書謚孝肅

唐忠肅

唐介字子方荊州人宋仁宗朝為御史裏行劾文彥博

獨專宰政除授非人上怒貶英州別駕後召知諫院從
御史吳中復請也神宗熙寧中叅知政事數與王安石
爭辯而帝主安石說介不勝其憤疽發背而卒謚忠肅

范文正

范仲淹字希文其先邠人後徙蘇州其所學必以忠孝
為本所志則先天下之憂而憂後天下之樂而樂有所為
必盡其方曰為之自我當如是其成與否有不在我者雖
聖賢不能必故先儒論宋朝人物以仲淹為第一封汝

南公謚文正四子純祐純仁純禮純粹

韓忠獻

韓琦字稚圭相州安陽人年二十登進士第與范公在
兵間最久時有一韓一范之謠嘉祐中拜平章事為相
十年光輔三后歐公心服其德量英宗朝封魏國公及
薨神宗親製碑題曰兩朝顧命定策元勲之碑謚忠獻
徽宗朝追封魏王四子忠彥粹彥純彥幼子嘉彥徽宗
朝拜相封儀國公

趙康靖

趙鼎字叔平宋仁宗朝與歐陽修同知起居注後叅大政秉心和平與人無怨惡然陰以利物者為多時比之劉寬婁師德謚康靖

薛簡肅

薛奎字伯藝絳州正平人宋仁宗即位推龍圖閣待制後知開封府以嚴為治京師肅清知益州為政明決蜀人比之張詠謚簡肅

歐陽文忠

歐陽脩字永叔廬陵人宋仁宗時為諫官以韓琦范仲淹相繼罷去上疏極諫出知滁州自號醉翁還為翰林學士拜叅知政事與韓琦同心策立英宗熙寧初以太子少師致仕號六一居士卒贈充國公謚文忠文章名冠天下與唐韓愈並稱云子棐以文學世其家官至右司郎中

司馬文正

司馬光字君實陝人宋哲宗元祐初拜相兒童走卒皆知其名凡王安石呂惠卿所建新法為民害者剗革畧盡一變而為嘉祐治平之治君子稱其有旋乾轉坤之功封溫國公號涑水先生年六十八薨贈太師謚文正父池少好學且尚義推家財數十萬與諸父兄旦累官知安州子康除司諫

周元公

周敦頤字茂叔道州營道人初因舅鄭向任為分寧主

簿有獄久不決公一訊立辨調南安司理有因法不當
死轉運使王逵欲深治之公力與辯不聽公委手板將
棄官去逵悟因得釋調桂陽令改知南昌富家大姓惡
少惴惴焉不獨以得罪為憂而又以汙穢善政為恥熙
寧中提點廣東刑獄以洗冤澤民為己任司理南安通
判程珣遣二子顯頤往受業歷知南康軍築室於蓮花
峯下學者稱為濂溪先生所著有太極圖易通行於世
謚元公

楊文公

楊億字大年建州浦城人十一歲試童子科揮毫若飛
文不加點頃刻數千言與劉筠齊名真宗朝為正字遷
知制誥翰林學士上嘗謂王旦曰億辭學無比後學皆
師慕之文章有元和風格自億始也卒謚文

富文忠

富弼字彥國河南人宋慶厯中以知制誥使契丹却獻納
二字北朝君臣甚敬憚之還拜樞密副使及知青州全

活饑民五十餘萬人熙寧中拜同平章事時神宗以災
變減膳徹樂王安石言災異皆天數非關人事得失所
致弼曰此治亂之機也不可以不速救即上書數千言
雜引春秋洪範及古今傳記人情物理以明其決不然
者忠義之性老而彌篤居家一紀斯須未嘗忘朝廷計
聞贈太尉謚文忠先封鄭公晉封韓公子紹庭紹宗紹
隆孫直柔

呂正獻

呂公著字晦叔夷簡之子熙寧中起知河南尹元祐中
與溫公並相歷事四朝平居無疾言遽色於聲利紛華
淡然無所好且識慮深遠遇事善決王安石博辯騁詞
人莫與抗公獨以精識約言服之始封東平公卒贈太
師申國公謚正獻三子希哲希績希純希哲子好問好
問子弼中本中弼中子大器大器子祖謙

范忠文

范鎮字景仁成都華陽人薛奎守蜀還朝或問入蜀所

得答曰得一偉人當以文學名世蓋謂公也公為人清
白坦夷篤於行義至於臨大節決大義色和而語莊雖
在萬乘前無所屈兩人翰林四知貢舉其道德風流足
以師表百世熙寧間士大夫論天下賢者必曰君實景
仁年六十三乞致仕歸蜀進銀青光祿大夫卒年八十
一封蜀郡公謚忠文猶子百祿百常

孫溫靖

孫固字和父鄭州管城人元豐元年拜同知樞密事謀

者告夏人幽其主神宗遽欲西討固諫曰舉兵易解禍
難前後論之不下數千言元祐初除侍讀遂除知樞密
院事卒謚溫靖

文忠烈

文彥博字寬夫介休人逮事四朝任將相五十年名聞
四夷封潞公平居接物謙下尊德樂善如恐不及功成
退居朝野倚重卒年九十二謚忠烈子及甫

魯文昭

曾肇字子開剛大之氣睥然見於面人知其為成德君子也在朝以論思之責為己任徽宗朝為翰林學士卒謚文昭次兄布字子宣建議行王安石新法徽宗朝拜相封魯公謚文肅長兄肇字子固文章名天下元豐五年與李清臣等修史上手詔中書曰五朝史事宜付曾肇遂為史館修撰史成賜龍衣金帶推試中書舍人祖致堯致堯子易簡易占易占三子肇布肇

傳獻肅

傅堯俞字欽之鄆州項城人元祐四年拜中書侍郎名重朝廷風節凜然且重厚寡言遇人不設城府人不忍欺在位三年卒太后謂輔臣曰傅侍郎清直一節始終不變金玉君子也方倚以為相遽至是乎謚獻肅或曰謚獻簡

韓忠憲

韓億字宗魏真定靈壽人宋仁宗朝參大政卒謚忠憲八子綱綜絳繹維縝緝緬而絳縝位宰相維門下侍郎

馬正惠

馬知節字子元年十八監彭州兵馬以嚴見憚治績卓然宋景德中拜樞密使剛直敢言不少卑屈嘗與王欽若爭事上前退見王旦詞色猶怒甚曰知節幾欲以笏擊死之但恐驚動君相耳謚正惠

周文忠

周必大字子充廬陵人舉進士第又中博學宏詞科在翰林九年嘗言六十四卦惟謙六爻皆吉又誦夫子其

恕乎一語故平生處己以謙待物以恕淳熙中拜右相
進少保封益國公退居十五年自號平園老叟築室名
玉和謚文忠子綸知筠州

蔡忠惠

蔡襄字君謨仙遊人天聖進士累官知諫院精吏事所
至有聲文章清粹工小楷草書歐公以為獨步當世官
至端明學士謚忠惠子無考孫仲玄孫洸位八座戡為
侍從如櫛樞師言數言諒詵六人俱登第皆公之諸孫

也

种忠憲

种師道字彝叔世衡之孫為山西望族宋靖康中金人圍城公以河東河北制置使將援兵赴關因入對為戰守計除同知樞密院京畿宣撫使知兵有謀華夷著稱謚忠憲

范忠宣

范純仁字堯夫文正公次子宋元祐初拜相性夷易寬

簡不以聲色加人嘗戒子弟曰吾平生所學得之忠恕
二字一生用不盡也及疾革口占遺表勸徽宗清心寡
欲約已便民毋輕議邊事毋易逐言官卒贈開府儀同
三司謚忠宣

黃文節

黃庭堅字魯直分寧人東坡薦之曰瑰奇之文妙絕當
世孝友之德追配古人初與李公擇相見於舒州石牛
洞山谷寺常遊而樂之故自號山谷道人謫涪州別駕

因號涪翁謫黔州寓開元寺寺有摩圍泉因號摩圍老人呂居仁推為江西詩祖元祐中為太史徽宗崇寧初謫宜州次年召還未行疾革而卒謚文節子相

宗忠簡

宗澤字汝霖有文武才宋高宗建炎初為東京留守威望素著盜賊屏息前後二十餘疏請帝還京為黃潛善汪伯彥所抑憂憤成疾疽發於背因咏杜詩云出師未捷身先死長使英雄淚滿襟連呼過河者三而卒謚忠

簡子穎

楊忠襄

楊邦乂吉水人宋建炎中倖建康金兵大至杜充戰敗遁去公刺血書襟曰寧為趙氏鬼不作他邦臣遂遇害紹興中再賜田三百畝官其一子謚忠襄五子振文郁文有名於時

楊文靖

楊時字中立號龜山與游定夫謝顯道俱遊明道先生

之門學有本原行無玷缺紹興中奉祠致仕以著書講學為事東南學者推為程氏正宗徽宗朝為國子祭酒謚文靖

晏元獻

晏元獻字同叔撫州臨川人七歲善屬文宋景德初張知白安撫江西薦之試神童科除正字置之祕閣又召試中書為集賢校理從陳彭年學後為江西留守幕下士王琪張亢最為上客范仲淹孔道輔歐陽脩一時名

士多出其門天聖中拜相其屬文有元和風格卒謚元獻子叔原號小山有樂府行於世山谷為序

李忠定

李綱字伯紀邵武人高宗即位首拜為相上十議方七十五日而罷史臣謂其以一身用舍為社稷安危雖身或不用用且不久而其忠誠義氣凜然動乎遠邇可謂一代之偉人矣封隴西郡公卒贈少師謚忠定子宗之

岳武穆

岳飛字鵬舉湯陰人少負氣節好左氏春秋孫吳兵法引弓百斤善左右射宋靖康初金人南侵二聖北狩飛出應募為秉義郎犯法將刑宗澤一見奇之會金人攻汜水以五百騎授飛使立功贖罪飛大敗金人而還升為統制其用兵能以少擊衆建炎紹興間大小百餘戰未嘗敗北及入覲上賜金絲戰袍金帶衣甲等又御書精忠岳飛四字揭旗以授之飛兵追烏珠至朱仙鎮金人有捐燕以南之懼大業已垂成矣時秦檜方主和議

矯詔班師竟為所害官至少保封武昌公贈太師謚武穆追封鄂王子五人雲左武大夫隨飛征戰屢立奇功雷霆俱閣祇候霖敷文閣待制震茶鹽監提舉霖子珂知嘉興府

趙忠簡

趙鼎字元鎮宋紹興中當國專以固本為先人才所當召用者條而置之座右次第奏行之故列要津者多一時之望人號為小元祐帝嘗親書忠正文德四字及尚

書一帙賜之中興賢相鼎為稱首惜為賊檜讒忌貶竄
遐方不食而死天下聞而悲之至孝宗時贈太傅追封
豐國公謚忠簡

韓忠武

韓世忠字良臣延安人宋建炎初為統制勇冠三軍擒
賊苗傅劉正彥送行在斬之帝手書忠勇二字揭白旗
以賜焉公性戇直敢言持軍嚴重器仗規畫精絕過人
掠陣斧克敵弓以至狻猊之鏐連鎖之甲皆其遺法也

與劉光世岳飛張俊為中興四大將封咸平王後解兵
罷政臥家十年乃卒孝宗隆興中追封蘄王謚忠武子
彥直彥質彥古皆以才見用

洪忠宣

洪皓字光弼鄱陽人士良之後宋政和中為寧海簿攝
令事蠲貧弱戶稅四千八百有奇宣和中為秀州錄事
州有水災籍有粟者毋貴糶戒米肆揭價於青白旗上
全活九萬五千餘人號洪佛子建炎中擢徽猷閣待制

禮部尚書使金流遞冷山二十年還朝擢朝請大夫復
貶英州九年紹興二十五年始復朝請郎徙袁州至南
雄卒謚忠宣長子适字景伯號盤洲謚文惠次遵字景
嚴號小隱謚文惠季邁字景廬號容齋謚文敏

趙清獻

趙抃字閱道西安人氣貌清逸人不見其喜愠之色自
號知非子宋仁宗至和中為殿中侍御史彈劾不避貴
勢遷龍圖學士兩知成都累官至叅政與王安石不合

懇求去出知杭州元豐初告老退居於衢年七十七薨
謚清獻二子岵岵元豐中岵岵為溫倅迎清獻公就養
名其堂曰戲綵人稱篤行君子

馮文簡

馮京字當世鄂州江夏人式之子幼雋邁不羣式嘗取
其所誦書題其後云將作監丞通判荆南軍事馮京後
十年京舉進士自鄉選至廷對俱第一除將作監丞通
判荆南軍事果如式言遷翰林學士知開封府兩叅大

政初與王安石不合後為呂惠卿所傾中立不倚人服其操謚文簡

徐節孝

徐積字仲車楚州人事親孝旦夕必冠帶而後定省從胡瑗學居一室寒一裘啜粟飲水不受問遺中年屏居窮里而四方之事無不知以近臣薦授楚州教授每升堂訓諸生語聞者無不敬服元豐八年詔賜粟帛以旌其孝徽宗朝除宣德郎謚節孝

程純公

程顥字伯淳十歲能為詩賦十二三居庠序如老成人
後舉進士歷鄆縣上元主簿晉城令專尚德化熙寧初
為御史裏行論新法不合去後又知扶溝丞坐獄逸囚
責監汝州稅哲宗立召為宗正丞命下而卒顥生平以
道學鳴世人稱為明道先生卒年五十四封河南伯謚
純公

程正公

程頤字正叔顥之弟少有高識非禮不動哲宗初詔授西京國子教授力辭後召見推宗正殿說書文彥博稱為真侍講與兄顥昌明道學出其門者甚衆世稱伊川先生封伊陽伯謚正公

任安惠

任中師字祖聖宋仁宗除右諫議大夫身處通顯自奉甚薄上以飛白書賜之及歸休建御書閣鄉人榮之謚安惠兄中正叅大政謚康懿

曹武毅

見將帥

曾文清

曾幾贛州人開之弟幼有識度事親孝紹興間歷官浙西提刑秦檜怒開併幾亦罷之檜死起知台州尋授祕書少監修實訓成權禮部侍郎謚文清

蔡文忠

蔡齊字子思神色明秀鬚眉如畫祥符八年進士喜薦

人才如楊偕郭勸輩皆為當世名臣仁宗朝大拜謚文忠

王文公

王安石字介甫號半山老子臨川人熙寧中行新法大為民害封荊公卒謚文追封舒王劉元城言王金陵亦非常之人其質朴儉素始終好學與司馬公畧同但學有邪正各欲行所學耳攻金陵者乃謂其以財利結人主如桑弘羊禁人言以固位如李林甫奸邪如盧杞大

惡如王莽則言之過激而人不信之矣此可以為進言者之戒父益弟安國子雱

余襄公

余靖字安道韶州曲江人舉進士遷祕書丞集賢校理范仲淹以言事忤旨貶饒州靖上言陛下親政以來屢逐言官以鉗天下之口落職知春州又為時所忌出知吉州又坐習蕃語奪官後起知處州帥潭州移青州謚襄公

邵康節

邵雍字堯夫河南人天性高邁迥出千古而坦夷溫厚
不見圭角先生之學得之李挺之所著有皇極經世觀
物內外篇漁樵問答擊壤集行世卒年六十七程明道
銘其墓朱文公為之贊元祐中賜諡康節子伯溫孫溥
紹興中除徽猷待制溥祕書省校書郎

王敏懿

王素字仲儀旦第三子仁宗朝為御史時目為獨擊鵲

出入侍從及為將帥三十餘年以工部尚書致仕謚敏懿子輦

吳正肅

吳育字春卿舉制科直史館修太常禮四十卷慶厯中叅大政謚正肅

邵安簡

邵亢字興宗宋英宗召對羣玉殿曰學士真國士也後知制誥遷吏部侍郎謚安簡

陳忠肅

陳瓘字瑩中號了翁南劍州人哲宗時章蔡主紹述謗及宣仁太后瓘因論帝王之孝與士大夫不同哲宗遂大感悟至神宗即位除瓘右正言又論紹聖中史官蔡卞專據王安石日錄改修神宗史變亂是非不可傳信換成一書名尊堯錄上之先是瓘以忤蔡京竄郴州今何執中謹事蔡京代為首相復徙瓘台州又起遷人石械知台州欲置瓘以必死窘辱百端終不能害在台五

年乃得自便卒贈左諫議大夫紹興中特謚忠肅

胡文定

胡安國字康侯崇安人紹聖中對策哲宗親擢第三除太學錄宣和中去位高宗即位召拜給事中為黃潛善所忌遂罷復召為中書舍人兼侍讀安國因上時政論二十一篇論入改給事入對帝遂以左傳付安國點句正音安國言春秋經世大典非空言比左氏煩碎不宜虛費光陰莫若潛心聖經帝遂命兼侍讀專講春秋紹

興八年復以所著春秋傳上之詔加寶文閣學士命未
下而卒謚文定長子寅字明仲號致堂次子寧字和仲
號茅堂季子宏字仁仲號五峯姪憲字原仲號籍溪

胡修簡

胡宗愈字完夫哲宗朝黨人方盛公進無黨論及知成
都錄杜詩刻石於草堂自作碑序官至吏部尚書崇寧
中與李清臣等俱入元祐黨籍卒謚修簡

劉武穆

劉錡慷慨沈毅有儒將風忠義之心老而彌篤紹興十年金烏珠等分道南侵錡為東京副留守大敗之於順昌兀朮走汴十一年敗烏珠於石皋復廬州三十一年金人陷揚州錡遣兵拒於阜角林大敗之又侵瓜洲時錡病劇葉義問以李橫權錡軍遂督兵渡江衆以為不可義問強之統制劉汜請出戰錡不從汜遂拜家廟而行竟敗績橫汜僅以身免義問遵陸走建康錡聞汜敗發怒嘔血數升尋卒謚武穆

張忠獻

張浚字德遠號紫巖先生紹興五年與趙鼎並同平章事尋命視師潭州及還上中興備覽四十一篇帝嘉嘆置之座隅七年兼樞密使及酈瓊敗呂祉死浚引咎力求去上以趙鼎代之浚既去位言者論之不已復安置永州時胡澹庵謫於衡二公手書往來無一語不相勉以天下之學無一念不相憂以國家之事雖小兒婦女亦知天下有張都督也孝宗即位進封魏國公謚忠獻子

栻字敬夫號南軒

虞忠肅

虞允文字彬父十歲賦詩有驚人語諸老知其遠器宋
紹興中督師江淮大敗金人於采石孝宗乾道中拜相
置翹材館延四方賢士懷袖有方冊曰材館錄聞人一
善必書之首薦胡銓張震等二十一人一時得人之盛
有慶厯元祐風封雍國公卒贈太傅謚忠肅

吳武安

吳玠字晉卿少沈毅尚氣節日講武經七書用兵本孫
臆吳起宋高宗朝宣撫四川保有全蜀雖卒伍最下者
亦得以情自達故士樂為之死上嘗以所御戰袍賜之
曰大丈夫當自結主知何必附人而進後進位開府儀
同三司謚武安

吳武順

吳璘字唐卿玠之弟負氣節善騎射著兵法二篇代兄
玠守蜀二十年隱然方面之重民安之如一日也乾道

初加太傅封新安郡王諡武順

李忠襄

李顯忠字君錫綏德青澗人自北而來忠於朝廷破家徇國志復中原竟為權奸見忌弗克遂願孝宗朝除太尉卒贈隴西郡開國公諡忠襄

胡忠簡

胡銓字邦衡號澹庵廬陵人紹興中為樞密院極言和議誤國乞斬王倫孫近秦檜三人頭懸之藁街然後羈

留金使責以無禮徐興問罪之師則三軍之士不戰而氣自信書上詔貶廣州都鹽倉金人以千金購得其書大驚遂退師陳剛中送公詩身為嶺海之行名若泰山之重張魏公曰秦檜專柄二十年只成就得一個胡邦衡耳卒謚忠簡

趙忠定

趙汝愚同姓之卿也光宗紹熙五年為右丞相韓侂胄忌之寧宗慶元元年罷汝愚右相以觀文殿學士出知

福州未幾用何湛疏又竄於永州汝愚怡然就道行至衡州病作衡守承侂冑密旨窘辱百端暴卒天下冤之汝愚學務有用常以司馬光富弼韓琦范仲淹自期凡平昔所聞於師友如張栻朱熹等之言欲次第行之未果而罷政不遂厥志嘉定元年贈太師沂國公謚忠定追封福王

丁文簡

丁度字公雅登服勤詞學科宋仁宗朝為翰林學士十

年著通英要覽十卷上呼學士而不名遷端明殿學士
上嘗謂曰度為侍從十五年議論天下事未嘗及私後
拜叅知政事謚文簡

呂成公

呂祖謙字伯恭號東萊先生夷簡五世孫也自其祖好
問隨高宗南渡卜居婺州隆興初中宏詞科除祕書兼
編修奉詔編次宋朝文鑑書成除直祕閣其學本之家
庭得中原文獻之傳年四十五卒謚曰成封開封伯弟

祖儉號大愚卒謚忠祖儉弟祖泰

朱文公

朱熹字元晦居紫陽山下從學於屏山籍溪初居崇安
匾讀書堂曰紫陽書堂後築室建陽號雲谷老人其草
堂曰晦庵自號晦翁晚居考亭精舍號滄洲病叟最後
號遜翁寧宗慶元中攻偽學日急熹與諸生講學不休
或勸其謝絕生徒者笑而不答疾且革正衣冠就枕而
卒謚曰文理宗寶慶中贈太師信國公紹定中改封徽

國公子在以恩補承務郎歷官工部侍郎

陸文達

陸九齡字子壽撫州金谿人幼穎悟端重泰檜當國程氏學廢九齡獨尊其說乾道中舉進士調興國教授嚴規矩勸綏羽翼士類興起改全州教授謚文達

陸文安

陸九淵字子靜九齡弟也生而穎異伯仲間閭閻侃侃自相師友乾道中登第呂東萊識其文於數千人中謂

曰一見高文知其為江西陸子靜也居貴溪之象山教授生徒數十百人學者稱為象山先生或勸其著書答曰學苟知道六經皆我註腳嘗與朱熹會於鵝湖辯論多不合及熹至白鹿洞九淵為講君子小人喻義利一章熹以為切中學者者隱微深痼之病至於無極而太極之辯則兩書與熹謂不當又加無極二字及知荆門軍政行令修民俗為變謚文安其次兄九韶亦學問淵源人稱為梭山先生

真文忠

真德秀字希元浦城人號西山先生初為起居舍人兼
宮講言事不避貴勢知史彌遠欲以爵祿縻天下士遂
力請外出帥湖南潭人為立生祠寧宗嘉定中召為直
學士院勸帝容受直言召用賢臣固結人心為本理宗
端平元年召為翰林學士院以大學衍義進二年遂參
大政德秀在朝不滿十年奏疏將數十萬言皆切當世
要務直聲震朝廷四方文士誦其文想見其風采後得

疾三上表乞祠授資政殿學士提舉萬壽宮踰月而卒
贈銀青光祿大夫謚文忠

魏文靖

魏了翁字華父號鶴山宋開禧初以武學博士召試學
士院對策諫開邊事御史徐相劾其狂妄出知嘉定府
築室白鶴山下以所聞於輔廣李燾者開門授徒士爭
負笈從之由是蜀知義理之學及為潼川轉運判官上
疏乞與周敦頤張載程顥程頤錫爵定謚示學士趨向

朝廷從之理宗寶慶元年諫議大夫朱端承史彌遠旨
劾了翁欺世盜名朋黨謗國詔落職奪三秩靖州居住
了翁至靖州建鶴山書院湖湘江浙之士不遠千里負
書從學乃著九經要義百卷端平元年召為直學士院
入對言事剴切至漏下四十刻乃退帝將引以共政而
忌者合謀排擯之且言了翁知兵乃命同簽書樞密院事
督視江淮京湖軍馬陞辭御書嚴武詩及鶴山書院四
大字賜之謚文靖

戚堅素

宋戚同文字文約幼孤事祖母以孝聞從邑人楊慤受經慤隱居不仕而以女弟妻同文遇疾篤因託以家事同文為葬其三世之未葬者遭世喪亂亦不復仕且思見混一遂以同文為名聚徒講學相繼登科者五十六人踐臺閣亦至十數尚信義喜周人急所交皆當世知名士楊徽之因使至郡多與之酬倡及卒徽之與其門人謚堅素先生長子維次子綸

宋宣獻

宋綬字公垂少聰警外祖楊徽之器愛之後以徽之遺
恩召試中書真宗奇其文再召試學士院授集賢校理
時綬父舉直集賢院父子同在館閣世以為榮仁宗朝
叅大政卒謚宣獻子敏求字次道

陳文忠

宋陳省華封秦公長子堯叟字唐夫端拱三年狀元及
第天禧中平章事謚文忠次堯佐字希元仁宗朝呂申

公求退遂大拜號知餘子謚文惠季堯咨字嘉謨咸平
中狀元累官翰林知制誥謚康肅

程文簡

宋程琳累官三司使出納尤謹後拜尚書左丞出判大
名魏人愛之為立生祠謚文簡

張文忠

張九成字子韶號無垢錢唐人年十四鄉貢辟雍從楊
時學紹興中以直言對策上及兩宮下及閭寺仕至禮

部侍郎與秦檜議論不合謫居南安軍後知温州理宗時贈太師追封崇國公謚文忠子遜厚幼厚

何恭敏

何鑄餘杭人政和中進士紹興中拜御史中丞秦檜陷岳飛命鑄鞫之鑄白其寃檜不悅諷万俟卨使論鑄私岳飛欲竄嶺表帝不從仕至資政殿學士謚恭敏

蔡文節

蔡元定字季通號西山建陽人間朱熹名往從之熹叩

其學大驚曰此吾老友也不當在弟子列所著有律呂新書八陣圖說謚文節子沈字仲默號九峯師事朱熹熹欲註書遂以屬沈沈子抗字子直

李文靖

李侗字愿中號延平幼從羅從彥受春秋與朱松為同門友結廬茅山謝絕世故沙縣鄧迪嘗稱其如冰壺秋月瑩徹無瑕朱熹師事之卒謚文靖與李沆同

文忠烈

文天祥字宗瑞一字履善廬陵人英姿俊爽目光如電
舉進士第一授寧海軍節度判官歷湖南提刑元伯顏
軍至皋亭山天祥往說之被脅至真州而遁時益王駐
福州天祥上書勸進以樞密使號召天下兵屯贛州戰
雩都大捷加少保信國公後嶺南兵敗被執服毒不死
執至京見博羅丞相不跪問有何言曰為宋丞相宋亡
義當死更何言自是因兵馬司者四年屢請死世祖從
之將出獄自贊云孔曰成仁孟曰取義惟其義盡所以

仁至讀聖賢書所學何事而今而後庶幾無愧南面再拜就死至明朝追謚忠烈

楊文節

楊萬里字廷秀號誠齋吉水人舉進士調零陵丞改知奉新孝宗朝召為國子博士以寶文閣待制致仕進寶謨閣學士際遇三朝始終一節杜門著書絕意榮宦開禧中見邊釁驟開謂必悞國幽憤激烈不食而死謚文節子長孺字伯子號東山潛夫

劉忠肅

劉摯字莘老教子孫先行實後文藝元祐中拜右相後
謫新州卒謚忠肅

劉忠顯

劉韜字仲淹建之崇安人始書生起白屋累歷大藩歷
事五朝紹興中使金不屈死之孝宗即位勅賜資政殿
大學士謚忠顯二子子羽子翬

王忠文

王十朋樂清人紹興中廷對忠鯁高宗親擢第一累官
太子詹事以龍圖閣學士致仕謚忠文有梅溪集行世
子聞詩聞禮

葉忠簡

宋葉義問嚴州府壽昌人建炎中累知樞密院事時金
主亮窺江上上命義問視師江上御書義問到處如朕
親行八大字於旗以賜之卒謚忠簡

楊恭毅

宋楊震代州人宗閔子弓馬絕倫從折可存討方臘有功靖康初夏人圍建寧時震方知建寧寨率士與戰矢盡力乏與子居中執中俱戰沒惟長子存中從征河北獨免建炎中追贈官爵謚恭毅

蘇文公

蘇洵字明允號老泉屢舉進士賢良不中嘉祐間與其子軾轍至京師歐陽脩得洵所著權書論衡等二十二篇愛其文詞以為賈誼劉向不是過也因以其書獻於

朝召試舍人院除校書郎名動京師學者以其父子俱知名故稱老蘇以別之謚文公兄二人澹渙

孫宣公

孫奭字宗古為國子直講宋太宗幸國子監奭講說命三篇賜緋章服真宗時為給事擢五經切於治道者為五十篇號經典徽言謚宣公

蘇文忠

蘇軾字子瞻眉山人士號東坡居士元豐中自徐徙知湖

州又以事不便民者不敢言以詩托諷被讒者指摘以
為怨謗君父貶黃州團練副使哲宗元祐初召為翰林
學士宣仁召對便殿命坐賜茶徹御前金蓮燭送歸院
未幾出知潁州改知揚州復召為禮部尚書兼侍讀封
武功縣伯紹聖初貶知英州御史盧策言軾罪罰未當
又追一官惠州安置元狩中自昌化移廉州徙永州更
三赦復提舉玉局觀未幾卒於常州贈太師謚文忠長
子邁字伯達作文有父風咄咄有跨竈興中子适史失

其字少子過字叔黨善為文士大夫以小坡目之孫簞
太府卿符禮部尚書箕筌籌葵簫籍節笈簞筌嶠峴共
十四人

蘇文定

蘇轍字子由號穎濱遺老元豐初謫監筠州酒稅假部
刺史府以居即堂之東軒種杉二本竹百个為宴休之
所號東軒長老元祐初為尚書右丞門下侍郎轍與兄
軾為文如行雲流水初無定質雖嬉笑怒罵之詞皆可

書而誦之自為舉子至出入侍從必以愛君為本忠規
讜論挺挺大節但為小人忌惡不得久居朝耳封樂城
伯謚文定三子遲适遠孫簡等七人

樓宣獻

樓鑰字大防奉化人郁五世孫累官中書舍人遷禮部
尚書抗疏論韓侂冑遂投劾去後召為叅知政事卒贈
少師謚宣獻公為人質直而和粹所薦多名士號玫瑰
主人

豐清敏

豐稷字相之鄆縣人嘉祐中為穀城令以廉明稱元符
中拜諫議大夫御史中丞權禮部尚書後以樞密學士
知越州蔡京修故怨貶海州團練副使道州別駕卒公
三任言責草疏必藏密室雖子弟亦不得見退多焚稿
未嘗以時政語人建炎中追謚清敏

山堂肆考卷一百三十五

欽定四庫全書

子部

山堂肆考卷一百三十六

詳校官中書臣閔思毅

主事臣祁韻士覆勘

總校官降調編修臣倉聖脉

校對官中書臣陸湘

謄錄監生臣崔鶴立

欽定四庫全書

山堂肆考卷一百三十六 明 彭大翼 撰

人事

謁見

詩召南未見君子憂心愒愒亦既見止亦既覯止我

心則說

掃門求見

漢書魏勃欲見齊相曹參貧無以自通乃嘗早起掃齊

相舍人門舍人怪而問之答曰願見相君無因故為子
掃欲以求見於是舍人引謁勃參以為舍人

迎路候謁

東漢趙咨字文楚東郡人靈帝時拜東海相之官道經
滎陽令燉煌曹嵩咨之故孝廉也迎路候謁咨不為留
送至亭次望塵不及謂主簿曰趙君名重今過界不見
必為天下笑即棄印綬追至東海謁咨畢辭歸家

臨況魏其

史記灌夫有服過丞相田蚡丞相從容曰吾欲與仲孺
過魏其侯會仲孺有服灌夫曰將軍乃肯幸臨况魏其
侯夫安敢以服為辭請語魏其侯帳具將軍旦日早臨
武安許諾至旦平明令門下伺候至日中丞相不來灌
夫不懌按仲孺灌夫字魏其侯竇嬰也武安田蚡封武
安侯

往見薛宣

漢成帝時朱雲不復仕常居鄠田時出乘牛車從諸生

所過皆敬事焉薛宣為丞相雲往見之宣備賓主禮因
畱雲宿從容謂曰在田野無事且畱我東閣可以觀四
方奇士雲曰小生乃欲相吏耶宣不復敢言

內謁徑入

漢翟方進內謁徑入注云內謁猶今之通名也又晉桓
玄嘗詣王忱通人未出乘輦直進忱對立便鞭門幹玄
怒去之忱亦不畱

遺書徑去

東漢高彪字義方吳郡人嘗從馬融欲問大義融疾辭
不見乃覆刺遺書曰聞高風為日久矣故不待介者
造君子之門冀一見龍光敘腹心之願不圖辭之以疾
昔者周公兄父大武九命作伯以居華夏猶握髮吐飧
以接白屋之士天下歸德今君不能相見宜哉融省書
大慙遣人辭謝追請徑去不還

王粲在門

東漢王粲字仲宣蔡邕見而奇之邕嘗賓客盈坐聞王

粲在門倒屣迎之粲入年既幼弱貌又短小一坐盡驚
邕曰王生有異才吾不如也吾家文章當盡與之

王符在門

東漢王符字節信安定人隱居不仕耿介不同於俗嘗
著潜夫論度遼將軍皇甫規解官歸安定鄉人有以貨
得鴈門太守者亦去職還家書刺謁規臥不起迎既
入問卿在鴈門食鴈美乎有頃曰王符在門規素聞符
名遽驚起衣不及帶倒屣出迎援符手而還與同坐極

歡時人爲之語曰徒見二千石不如一縫掖言書生道義之貴也

不耐造請

東漢張敷曰臣性不耐造請

未嘗候謁

東漢井丹字大春受業太學通五經善談論性清高未嘗修刺候謁人梁松請友丹不肯見後遂隱遁

獨拜床下

東漢諸葛孔明每詣龐德公家獨拜床下德公初不令止司馬德操嘗詣德公值其渡沔上先人墓德操徑入堂呼德公妻子使速作黍其妻子皆羅拜堂下奔走供役德公還直入不知何者是客也

大罵門外

東漢禰衡字正平孔融愛其才數稱於曹操言衡欲詣操操大喜敕門者有客便通衡着布單衣跣巾手持三尺稅杖坐大營門以杖捶地大罵吏白外有狂生言語

悖逆操怒謂融曰彌衡豎子孤殺之如雀鼠直顧此人
素有虛名遠近將謂孤不能容人今送與劉表視當何
如衡臨發衆人爲之祖道衡後至衆人更相戒曰衡悖
虐無禮今因其後至咸以不起折之也及衡至衆人莫
肯起衡大號衆問其故衡曰坐者爲塚卧者爲屍屍塚
之間能不悲乎

不避寒暑

漢張湯造請諸公不避寒暑

乃彌信宿

世說郭林宗至汝南造袁奉高車不停軌鸞不輟軌詣黃叔度乃彌日信宿人問其故林宗曰叔度汪汪如千頃之陂澄之不清清之不濁其器深廣難測量也

載刺盈車

郭林宗名益顯士爭歸之載刺常盈車

操篲侍庭

莊子曰田開之見周威公威公曰吾聞祝賢學生吾子

與祝賢遊亦何聞焉田開之曰開之操拔簞以待門庭
亦何聞於夫子威公曰田子無讓寡人願聞之開之曰
聞之夫子曰善養生者若牧羊然視其後者而鞭之

曳裾王門

鄒陽諫吳王曰今臣盡智畢議易精極慮則無國不可
奸臣飾固陋之心則何王之門不可以曳長裾乎

操瑟王門

韓愈與陳商書曰齊王好竽有求仕於齊者操瑟而往

立王之門三年不得入叱曰吾瑟鼓之能使鬼神上下
客罵之曰王好竽而子鼓瑟瑟雖工其如王之不好何
是所謂工于瑟不工于求齊也

因鬼見帝

戰國策蘇秦在楚曰楚國之食貴於玉薪貴於桂謁者
難見如鬼國王難見如天帝今令臣食玉炊桂因鬼見
帝

對賓杖僕

顏氏家訓昔者周公一沐三握髮一飯三吐哺以接白
屋之士一日所見七十餘人晉文公以沐辭豎頭須致
有圖反之誚門不停賓古所貴也失教之家閤寺無禮
或以主君寢食嗔怒拒客未通江南深以為恥黃門侍
郎裴之禮好待賓客或有此輩對賓杖之僮僕接引折
旋俯仰莫不肅敬與主無別

不候陳寔

東漢許劭字子將嘗到潁川多長者之遊唯不候陳寔

又陳蕃喪妻還葬劭獨不往或問之曰太丘道廣廣則難周仲舉性峻峻則少通故不造也

不詣崔喜

唐王績字無功絳州人刺史崔喜請見答曰柰何坐致嚴君平耶卒不詣

不見州尊

東漢劉璋時王商與秦宓書曰貧賤困苦何可終身宜一來與州尊相見宓答曰僕曝背於壠畝之中誦顏氏

之簞瓢詠原憲之蓬戶斯乃僕得志之秋何困苦之有哉

不詣京尹

見薦舉

盛服至門

漢書雋不疑字曼倩渤海人暴勝之為直指使者衣繡持斧逐捕盜賊東至海素聞不疑賢遣吏請與相見不疑冠進賢冠帶櫛身劔佩環玦褒衣博帶盛服至門上

謁門下欲使解劔不疑曰劔者君子武備所以衛身不可解請退吏白勝之開閣延請躡履起迎按躡履謂納履未正曳之而行也

連騎造門

撫言唐李賀年七歲以長短之製名重京華時韓愈與皇甫湜覽賀所作奇之因連騎造門求見賀總角荷衣而出二公因令面賦一篇賀承命欣然操觚染翰旁若無人名所作曰高軒過二公大驚

住車間巷

漢書樓護字君卿齊人與谷永俱為五侯上客後為諫
議大夫使郡國奏事稱意擢為天水太守數歲免家居
長安時成都侯王商為大司馬衛將軍罷朝欲侯樓護
主簿諫將軍至尊不宜入間巷商不聽遂至護家家狹
小官屬立車下久住移時天欲雨主簿謂西曹掾曰不
肯彊諫反雨立間巷商還或白主簿語商恨以他職事
去主簿終身廢錮

投贄皮箱

鄭光業有一巨皮箱凡投贄有可嗤者即投其中號曰
苦海

造請不報

漢書張禹傳公卿造請禹終不行報謝

訪謁不遇

宋呂蒙正少貧訪謁不遇有詩云十謁朱門九不開滿
頭風雪却回來歸家羞覩妻兒面撥盡寒爐一夜灰又

李觀初為太學官上言新法不便出為處州通判題詩
曰十謁朱門九不開利名淵藪日徘徊自知不是公侯
骨夜夜江山入夢來

名刺減字

彌衡尚氣剛傲建安初自荊州北遊許都書一刺懷之
至於刺字漫減而無所通或問之曰何不從陳長文司
馬達乎衡曰卿欲使從屠沽輩耶按古者未有紙削竹
為簡以書姓名故謂之刺後世造紙易之謂之名紙

名紙生毛

劉魯風投謁於所知為典謁者所阻因賦詩曰萬卷書
生劉魯風烟波萬里謁文翁無錢乞與韓知客名紙毛
生不為通

恚恨蔣濟

魏常林傳注時苗字德胄為壽春令蔣濟為治中苗初
至謁濟濟素嗜酒適會其醉不能見苗恚恨刻木為人書
曰酒徒蔣濟置之墻下旦夕射之

誤通劉澄

齊張融欲詣吏部尚書何戢誤通尚書劉澄下車入門乃曰非是至戶望澄又曰非是既造度視澄曰都自非是乃去

呂安題門

晉嵇康與呂安善安每一相思千里命駕後安詣康值康不在其兄喜出戶延之不入題門上作鳳字而去鳳字凡鳥也喜不覺猶以為欣又遯齋閒覽李安義者謁

富人鄭生生辭以出安義於門上大書午字而去或問其故答曰牛不出頭耳談苑江南處士朱貞白善嘲詠嘗謁一貴人不禮其廳事有格子屏風貞白題詩云道格何曾格言糊又不糊渾身都是眼還解識人無

清臣題壁

青瑣高議韓魏公知中山李清臣謁見其姪吏報曰大祝方寢清臣因題於壁云公子乘閒卧絳厨白衣老吏慢寒儒不知夢見周公否曾說當年吐哺無魏公見之

曰吾知此人久矣竟有東床之選

為忍俄頃

晉桓溫謀不軌欻超為之謀主謝安嘗與王文度共詣
欻超日旰未得前文度便欲去安曰不能為性命忍俄
頃耶其權重當時如此

先問存亡

劉綜欲候司馬徽先使左右問其存亡徽方鋤園左右
問司馬所徽曰我是徽頭面醜陋使者罵之曰即欲求

司馬公汝何等田奴而稱徽徽更刷頭飾服而出左右叩頭謝之

懷刺詣肇

後魏任城王澄子順為給事中時尚書令高肇帝舅也權重天下順嘗懷刺詣肇門門者以其年少答云在坐有大賓客不肯為通順叱之曰任城王兒可是賤也及見直往登牀捧手抗禮澄聞之大怒杖順數十

遺縑候炎

唐潘炎為翰林學士時京兆尹有故候炎累日不得見
乃遺閹者縑三百炎妻劉氏知之曰豈有京兆願一見
遺以三百縑其人可知也乃勸炎避位

三及相門

韓愈上宰相書足三及門而閹人辭焉

兩詣相門

名臣遺事諫議大夫張師德謁向文簡敏中曰師德兩
詣王相公門皆不得見恐為人輕毀望從容明之一日

方議知制誥王文正公曰可惜張師德向公曰何謂
王公曰吾累於上前說張師德名家子有士行不意兩
及吾門狀元及第榮進素定但當靜以待之耳若務奔
競使無階向進者當何如也

索遊上謁

范文正公在睢陽掌學有孫秀才者索遊上謁文正贈
錢一千明年復謁文正又贈一千因問何為汲汲於道
路孫生戚然動色曰母老無以養若日得百錢則甘旨

足矣文正曰吾觀子辭色非凡客也吾今補子為學職
月可得三千以供養子能安於學乎孫生大喜於是授
以春秋文正去睢陽孫亦辭歸後十年聞泰山有孫明
復先生以春秋教授學者道高德邁朝廷召至太學乃
昔日索遊孫秀才也文正嘆曰貧之為累大矣倘索遊
至老則雖人才如孫明復猶將汨沒也按孫復字明復
平陽人舉進士不第居秦山之陽學春秋著尊王發微
魯多學者自石介而下皆以弟子事之年四十家貧不

娶丞相李迪以弟之女妻之

還刺勿通

北齊李元忠初神武東出元忠乘露車載素箏濁酒奉迎神武聞其酒客未即見之元忠下車獨酌擘脯食之謂門者曰本謂公招延賢雋今國士到門不能吐哺輟洗其人可知還吾刺勿復通門者以告神武遽見之

願見將軍

王適聞李將軍喜士乃踵門曰天下善士王適願見將

軍白事

請見祭酒

唐高士廉在蜀備禮請見朱桃椎與之語桃椎不答瞪目而去士廉再拜曰祭酒其使我以無事治蜀耶乃簡條目州遂大治

光遠厚顏

唐進士楊光遠惟多矯飾不識忌諱遊謁王公之門干索權要之族未嘗自足稍有不從便多誹謗常遭有勢

者撻辱略無改悔人多鄙之皆云楊光遠顏厚如千重鐵甲

盧仝掩耳

韓文公寄盧仝詩先生結髮憎俗徒杜門不出動一紀
勸叅留守謁大尹言語纔及輒掩耳

自比樂天

金樓子有舉子能為詩每通名刺稱鄉貢進士黃居難
字樂地欲自比白居易字樂天也

人方樓護

梁天監間敕徐勉舉學士入華林撰通略勉舉何思澄
顧協等五人應選思澄重交結乃分書與諸賓朋校定
而終日造謁每宿昔作名刺一束侵曉便命駕朝賢無
不悉與狎處人方之樓護欣然當之投晚還家所齋名
刺必盡

留詩閉廳

見重陽

醉酒溺廬

五代唐趙鳳與于嶠俱在翰林相善鳳後為相嶠以才
名出鳳上而不用數非斥時政尤訛鳳鳳銜之因事左
遷嶠秘書少監嶠因醉酒往見鳳鳳辭以沐髮嶠詬直
吏又溺於從者直廬而去吏白溺於客次且詬鳳鳳以
聞明宗奪嶠官長流

投謁吉甫

監戒錄唐李吉甫之父微時以詩一絕投維揚都護宋

甄云十處投人九處違家鄉萬里又空歸嚴霜昨夜侵
人骨誰念高堂未授衣宋殊無接引之意李後生吉甫
吉甫節判青州有學子吳武陵詣府投謁竝不禮之武
陵遂書前詩以獻吉甫厚賂之請為寢默

往謁蔡齊

宋蔡文忠齊祥符間登進士第為狀元山東人賈同亦
名士也與公同州累往謁公值公飲酣不得見賈乃留
詩一絕云聖君寵厚龍頭選慈母恩深鶴髮垂君寵母

恩俱未報酒如為患悔何追公因此戒酒

餽遺

以食物與人曰餽以財物與人曰遺

受餐反壁

見妻

受羹反錦

左昭十三年羊舌鮒攝司馬遂合諸侯於平丘次於衛地叔鮒欲求貨於衛淫芻蕘者衛人使屠伯饋叔向羹

與一篋錦曰諸侯事晉未敢攜貳況衛在君之宇下而敢有異志芻蕘者異於他日敢請之叔向受羹反錦曰晉有羊舌鮒者瀆貨無厭亦將及矣

投瓜

詩衛風投我以木瓜報之以瓊琚投我以木桃報之以瓊瑤投我以木李報之以瓊玖

折麻

楚辭折疏麻兮瑤華將以遺兮離居

與帶

見朋友

遺絲

竹林七賢傳鬲令袁毅賄遺朝臣以營虛譽嘗遺山濤
絲百斤濤不欲為異受之命納於閣之梁上後毅事發
吏驗至山濤所濤於梁上取絲付吏絲已數年塵埃黃
黑封印如初

贈束帛

見朋友

送襲衣

宋張九成號橫浦初年處學正當苦寒衣衾不備鄉里
富人以有以襲衣為送者亦却不受曰士處貧苦正是做
工夫時節若不痛自節抑則貪欲心生廉恥喪矣工夫
何在

遺以狐裘

見貧人

贐以貂褥

宋秘書丞劉道原家極貧然一文不妄取於人冬寒歸自洛陽時無衣具司馬溫公以一二衣襪及一貂褥贐之固辭強之乃受及至潁川悉封以反溫公曰於光猶不受於他人肯受乎

遺魚

史記公儀休相魯客有遺魚者休不受客曰聞君嗜魚何故不受休曰以嗜魚故不受也今為相能自給魚若

受魚而免誰復給我魚者

送馮

見朋友

致邑

說苑曾子衣敝衣以耕於野魯君使人往致邑焉曰請
以此修衣曾子不受使者曰先生非有求於人人則獻
之奚為不受曾子曰參聞之受人者畏人予人者驕人
縱子不我驕也我能勿畏乎終不受

遺田

宋張正議與种世衡善及正議持父喪世衡遺以汝州田十頃固辭不受使者在途而世衡已卒其子以父命不復受以致蕪廢者五十年元豐中郡守劉夔請以田給州學朝廷不許遂命還种氏

遺米肉

東漢卓茂為密令人有言部亭長受其米肉者茂問亭長從汝求乎曰往遺之耳茂曰遺之而受何故言耶

餽梁肉

晉陶潛躬耕自資遂抱羸疾江州刺史檀道濟往候之
偃卧瘠餒有日矣道濟餽以梁肉麾而去之

餉鹿

唐韋詵休日登樓見人有所瘞藏者訪諸吏曰參軍裴
寬居也吏與偕來詵問狀答曰寬居義不以苞苴污其
家適有人以鹿為餉致而去不敢自欺故瘞之詵嗟異
乃引為判官

遺羊

崔從領鄜坊節度使党項市羊馬類先遺帥守從獨不取而厚慰待之自是羌人不敢犯境

紙受百番

見名士

書納一卷

唐孔若思傳有以書遺褚遂良者遂良止納一卷其人曰是書貴千金何取之廉答曰審爾此為多矣更還其

半

受茶一串

見刺史

受酒一盃

唐李素立為瀚海都護夷人感其惠率馬牛以饋素立
素立惟受其酒一盃餘悉還之

故吏歸練

唐郝處俊甫十歲而孤故吏歸千練贈之處俊不受

門生送布

見吏部尚書

海物致趙普

宋趙韓王普為相車駕忽幸其第時兩浙王俶遣使致書及海物十瓶於韓王置廡下會車駕至倉卒出迎未屏也上顧見問何物韓王以實對上曰此海物必佳即令啓之皆滿貯瓜子金韓王惶恐頓首謝曰臣未發書實不知若知之當奏聞而却之上笑云但取之無慮彼

謂國家事皆由汝書生耳因命謝而受之

土物寄少游

蘇東坡在揚州以土物寄秦少游有詩云鮮鯽經年秘
醢醢團臍紫鱗脂滿腹後春蓴茁滑如酥先社薑芽肥
勝肉鳧子纍纍何足道點綴盤餐亦時欲淮南風俗事
瓶罌方法相傳竟留畜且聞千里寄鵝毛何用孜孜飫
麋鹿

進燈籠錦

宋文彥博入相因張貴妃也貴妃父堯封嘗為彥博父
洎門客貴妃認彥博為伯父又欲士大夫為助於是誘
進彥博彥博知成都貴妃以近上元令織異色錦彥博
遂令工人織金線燈籠載蓮花中為錦紋貴妃始衣之
上驚曰何處有此錦妃正色曰昨令成都文彥博織來
以嘗與妾父有舊然妾安能使之以奉陛下耳上色怡
自是屬意彥博彥博自成都歸不久叅知政事遂至平
章事後因唐介上疏彥博出知許州明年上元中官有

詩曰無人更進燈籠錦紅粉宮中憶佞臣上聞此句亦笑
遺香蠟炬

野語秦檜當國四方餽遺日至方滋德帥廣東為蠟炬
以衆香實其中遣駛卒持詣相府厚遺主藏吏期必達
一日宴客吏曰燭盡適廣東方經略送燭未敢啓乃取
而用之俄而異香滿座察之則自燭中出也亟命藏其
餘枚數之適得四十九呼駛卒問故則曰經略專造此
燭供獻僅五十條既成恐不嘉試其一不敢以他燭充

數秦大喜以為奉已之專也待方益厚又鄭仲為蜀宣撫相府造格天閣畢工鄭書適至遺鋪地衣一張秦命鋪閣上廣狹無尺寸差秦默然不樂鄭竟失志至於得罪二公為計同一以見疑一以見厚固有幸不幸要不若守正之無悔吝也

山堂肆考卷一百三十六

欽定四庫全書

山堂肆考卷一百三十七 明 彭大翼 撰

人事

行旅

易旅卦旅即次懷其資得僮僕貞事理發揮在途曰
旅

牆屋必葺

左昭十五年叔孫舍所館者雖一日必葺牆屋去之如

始至

灑掃輒躬

東漢郭林宗宿逆旅輒躬灑掃及明去後人見之曰此必郭有道昨夜宿處也

迷途莫問

莊子曰黃帝將見大隗乎具茨之山方明為御昌寓騃乘張若習明前馬昆閭滑稽後車至於襄城之野七聖皆迷無所問途注云大隗至人也七聖即黃帝與方明

等也

思歸不忘

漢書韓王信報柴將軍曰僕之思歸如痿人不忘起盲者不忘視勢不可耳

食玉炊桂

見謁見

躡屩擔簦

虞卿躡屩擔簦以說趙王按簦笠之有柄者

鄭莊治行

史記漢武帝使鄭莊視決河自請治行五日上曰吾聞鄭莊行千里不齎糧請治行者何也按鄭當時字莊陳人也其先鄭君嘗為項籍將

匡衡隨牒

漢匡衡曰但以無階朝廷故隨牒在遠方注云謂隨補選之常牒不被超擢也

留滯

史記太史公自序是歲天子建漢家之封而太史公留
滯周南不得與從事故發憤且卒

支離

杜詩支離東北風塵際飄泊西南天地間

張衡顧燕

東漢張衡字平子南陽西岳人旅寓洛陽生計無聊有
命駕之意因顧梁燕曰秋風已至客興難久留也

穎士賦鵬

唐蕭穎士旅寓東陽思歸不得作白鵬賦意謂已之不得歸猶鵬之困於籠不得出也故雍陶和孫明府懷舊山詩秋來見說多歸思自起開籠放白鵬

萍浮

東漢鄭康成萍浮南北後因黃巾為害復歸鄉邦

梗泛

唐詩恓惶勞梗泛淒斷倦蓬飄

陸雲宿冢

晉陸雲嘗出行欲投宿故人家夜暗迷路莫知所從忽
見草中有火光於是趣之至一家便寄宿見一少年美
丰姿共談老子辭致深遠向曉辭去行十餘里至故人
家見數里中無人居却尋昨所宿處乃王弼冢雲本無
玄學自此日進

荀鶴思家

唐杜荀鶴秋旅中詩少年心壯輕為客一日病來思在
家

崔塗旅懷

唐崔塗旅懷詩水流花謝兩無情送盡東風過楚城
蝴蝶夢中家萬里杜鵑枝上月三更故園書動經年絕
華髮春惟兩鬢生自是不歸歸使得五湖烟景有誰爭

戎昱鄉淚

唐戎昱詩隔窓雲影滅復流北風微雨虛堂秋蟲聲竟
夜引鄉淚蟋蟀何知人自愁

櫛風沐雨

大選櫛風沐雨多在道路

飛雲滯月

李白詩心飛秦塞雲影滯楚關月

匹馬孤舟

鄭谷倦客詩十年五年岐路中千里萬里西復東匹馬
愁衝晚村雪孤舟悶阻春江風

殘茶冷酒

李白詩朝遊九城陌肥馬香車欺殺客暮宿五侯門殘

茶冷酒愁殺人

馬周呼酒

見狂肆

杜甫寄食

杜甫少貧不自振嘗客吳越齊趙間寄食於人又嘗卧
病長安旅次多雨生魚青苔及榻尋常車馬之客舊雨
來今雨不來

心折大刀

杜子美詩滿目飛明鏡歸心折大刀注云大刀頭有環
本古樂府義取於環猶古者放臣待命於境上賜環則
返今不能還如折大刀也又古詩云葉砧今何在山上
更安山何時大刀頭破鏡飛上天又從軍行云夜聞漢
使歸獨向刀頭泣

塵化緇衣

唐詩風塵不覺化緇衣謂客久而白衣變為黑色也又
云京洛多風塵素衣化為緇

敝裘羸馬

唐張籍行路難湘東行人長嘆息十年離家歸未得敝
裘羸馬苦難行僮僕盡饑少筋力君不見牀頭黃金盡
壯士無顏色龍蟠泥中未有雲不能生彼升天翼

店月橋霜

溫庭筠商山早行詩晨起動征鐸客行悲故鄉雞聲茅
店月人跡板橋霜槲葉落山路枳花明驛牆因思杜陵
夢鳬鴈滿迴塘

并州十霜

賈島渡桑乾詩客舍并州已十霜歸心日夜憶咸陽無
端更渡桑乾水却望并州是故鄉

蜀郡五載

杜詩五載客蜀郡十年歸梓州如何關塞阻轉作瀟湘
遊萬事已黃髮殘生隨白鷗安危大臣在何必淚長流
相看萬里眼

杜詩相看萬里眼一別五飛螢

有愧百年身

杜詩長為萬里客有愧百年身

浮游四方

李白浮游四方嘗乘月與崔宗之自采石至金陵着宮
錦袍坐舟中翫若無人

睥睨萬里

朱元晦十九歲作遠遊篇東征憂暘谷西遊畏羊腸南
轅犯癘毒北駕風裂裳願子馳堅車躡險摧其剛朝登

南極道暮宿臨太行睥睨即萬里超忽凌八荒無為斃
足者終日守空堂

餞別

漢臨江王傳黃帝之子累祖好遠遊而死於道故後
人祭之以為祖神也又荀彧傳共氏之子曰修好遠
遊至今祀以為祖神左傳祖而舍輶飲酒於其側曰
餞重始有事於道也朱子語錄祖道之祭是作一土
堆置犬羊於其上祭畢而以車碾從上過象行者無

險阻之患又以胙肉食之謂之餞禮

犯輶

周禮夏官大馭掌王路以祀及犯輶王自左馭馭下祀
登受轡犯輶遂驅之注云祀行之禮為輶犯者封土為
山象以菩芻棘栢為神主祭之以車轢之而去示無險
阻也

展軫

曲禮君車將駕則僕執策立於馬前已駕僕展軫致駕

送言

史記孔子去周而老子送之曰吾聞富貴送人以財仁者送人以言吾雖不能富貴而竊仁者之號請送子以言凡當世之聰明深察而近於死者好議人者也博辯宏大而危其身者好發人之惡者也孔子曰敬奉教也家語曰子路將行辭於孔子孔子曰贈汝以帛乎贈汝以言乎對曰請以言孔子曰不强不達不勞無功不忠無親不信無復不恭無禮謹此五者而已矣子路曰願

終身奉之

贈策

左文十三年趙宣子曰隨會在秦賈季在狄難日至矣
若之何中行桓子曰請復賈季卻成子曰不如隨會其
智足使也且無罪乃使魏壽餘偽以魏叛者以誘士會
執其帑於晉使夜逸請自歸於秦秦伯許之秦伯師於
河西魏人在東壽餘曰請東人之能與夫二三有司言
者吾與之先秦伯使士會士會辭曰晉人虎狼也若背

其言臣死妻子為戮秦伯曰若背其言所不歸爾帑者
有如河士會乃行繞朝贈之以策曰子無謂秦無人吾
謀適不用也士會既濟魏人譟而還秦人歸其帑注云
繞朝秦大夫策馬撾也隨會即士會唐李白送陶將軍
詩曰莫謂詞人無膽氣臨行將贈繞朝鞭

脂轄

左襄三十一年鄭子產曰巾車脂轄隸人牧圉各瞻其
事注云巾車主車之官以脂塗客之車轄轄車軸也以

膏塗之使旋轉快也

馳輪

晉王彪之方山別諸兄弟詩脂車總馳輪泣舟理飛棹
絲染墨悲嘆路岐楊感悼

送野

詩邙風燕燕于飛差池其羽之子于歸遠送于野瞻望
弗及涕泣如雨此衛莊姜送妾詩也

餞櫓

邙風出宿於涕飲餞於襦女子有行遠父母兄弟此衛
女思歸寧而不得故作此詩

歌驪駒

大戴記驪駒逸詩客欲去歌之其詞曰驪駒在門僕夫
具存驪駒在路僕夫整駕注云驪深黑色駒二歲馬

別黃鵠

蘇武贈李陵詩黃鵠一遠別千里顧徘徊胡馬失其群
思心常依依

班荆

見朋友

折柳

見橋梁

揖別陳遵

東觀漢記陳遵字孟公為大司農護軍使匈奴過辭於王丹臨訣丹謂遵曰俱遭時反覆唯我二人為天地所遺今子當之絕域無以相贈贈子以不拜遂揖而別遵

甚喜

心交國瑞

宋倪偁字文舉南渡後人居吳興錦山之下少有學行
受業張橫浦之門芮國瑞調桐川簿人皆以詩餞之公
曰吾與子不交以面而交以心芮曰珠玉之贈不如藥
石之賜

贈芍藥

韓詩曰芍藥離草也古今注牛亨問曰將離相贈以芍

藥何也董子答曰芍藥一名可離故將別以贈之亦猶相
招召贈之以丈無丈無亦名當歸也欲忘人之憂則贈
以丹棘一名忘憂草使人忘其憂也欲蠲人之忿則贈
以青棠青棠名合歡合歡則忘忿也

折疏麻

楚詞折疏麻之瑤華疏麻神麻也折之以贈行

厲聲高揖

孔叢子曰子高遊趙平原君客有鄒文李節者與子高

相友善及子高將還魯諸故人訣既畢文節送行三宿
臨別流涕交頤子高徒揮手而已及分背就路其徒問
先生與彼二子善彼二子有戀戀之心而先生厲聲高
揖無乃非親親之意乎高曰始吾謂此二子大夫耳今
乃知其婦人人生有四方之志豈鹿豕哉而常群聚乎
握手長嘆

蘇武別李陵詩征夫懷往路起視夜何其參辰皆已沒
去去從此辭行役在戰場相見未有期握手一長嘆淚

為生別滋努力愛春華莫忘歡樂時生當復歸來死當
長相思

登山臨水

楚辭悲莫悲兮生別離登山臨水送將歸

節酒散才

管輅別傳諸葛樂與輅別戒以二言曰卿性樂酒雖溫
克然不可保寧當節之卿有水鏡之才所見者妙禍如
膏火須當慎持卿散才於雲漢之間不憂不富貴也

數日作惡

世說謝太傅語王羲之曰中年傷於哀樂與親友別輒作數日惡羲之曰年在桑榆自然至此正賴絲竹陶寫恒恐兒輩覺損歡樂之趣

暫時分手

高適送李少府貶峽中王少府貶長沙詩嗟君此別意何如駐馬銜盃問謫居巫峽啼猿數行淚衡陽歸鴈幾封書青楓江上秋天遠白帝城邊古木疎聖代即今多

雨露暫時分手莫躊躇

浮雲

漢李陵贈蘇武詩良時不再至離別在須臾屏營衢路
側執手野踟躕仰視浮雲馳奄忽互相踰風波一失路
各在天一隅

零雨

晉孫子荆征西官屬送於陟陽侯作詩曰晨風飄岐路
零雨被秋草傾城遠追送餞我千里道

停驂輟棹

齊謝朓新亭渚別范雲詩洞庭張樂地瀟湘帝子遊雲
去蒼梧野水還江漢流停驂我悵望輟棹子夷猶心事
俱已矣江上徒離憂

載俎崇觴

柳子厚送河東薛存義序薛存義將行柳子載肉於俎
崇酒於觴追而送於江之澣飲食之且告之曰凡吏於
土者若知其職乎蓋民之役非以役民而已凡民之食

於土者出其十一傭乎吏使司平於我也今受其直怠
其事者天下皆然豈惟怠之又從而盜之如吾民何

過楚到秦

唐于武陵夜與故人別詩白日去難駐故人非舊容今
宵一別後何處更相逢過楚水千里到秦山萬重話來
天未曉月落滿城鐘

流恨結愁

杜詩第五橋東流恨水皇陂岸北結愁亭按第五橋皇

陂岸皆在長安城外乃會別之地也

上河梁

李陵為將失利降匈奴與蘇武詩攜手上河梁遊子暮
何之徘徊蹊路側悵悵不能辭行人難久留各言長相
思安知非日月弦望自有時努力崇明德白首以為期

出陽關

唐王維送人使安西詩渭城朝雨浥輕塵客舍青青柳
色新勸君更盡一杯酒西出陽關無故人後人以為陽

關曲三疊唱之陽關在長安西三疊者以後三句重疊唱之也一說每曲先七言中五言後三言故謂之三疊

參辰

蘇武贈李陵詩四海皆兄弟難為行路人況我連枝樹與子同一身昔為鴛與鴦今為參與辰又杜甫贈衛八處士云人生不相見動如參與商注云商星在東方卯位參星在西方申位各居東西永不相見也

弦括

陸士衡為顧彥先贈婦詩東南有思婦長嘆充幽閨借
問嘆何為佳人眇天末遊宦久不歸山川脩且濶形影
參商乖音息曠不達離合非有常譬彼弦與括願保金
石軀慰妾長饑渴注曰矢末曰括括會也與弦會

南浦

梁江淹別賦芍藥之詩佳人之歌桑中衛女上宮秦娥
春草碧色春水綠波送君南浦傷如之何

北梁

江淹別賦視喬木兮故里訣北梁兮永辭左右兮魂動
親賓兮淚滋可班荆兮增恨惟罇酒兮敘悲按北梁分
別之地故唐王勃別王長史詩正悲西候日忽動北梁
篇

加餐

古樂府胡馬依北風越鳥巢南枝相去日已遠衣帶日
已緩浮雲蔽白日遊子不顧返思君令人老歲月忽已
晚棄捐勿復道努力加餐飯

勸酒

蕭鳳使玉門關弟肅勸酒頻頻謂兄曰醉中庶分袂不
悲杜子美送王判官詩黔陽信使應稀少莫怪頻頻勸
酒盃

掩歡緒

宋孝武帝幸中興堂餞江夏王詩陰雲掩歡緒江山起
別心

起離端

謝混送二王往領軍府詩樂酒輟今辰離端起來日

珪璋交映

柳宗元送苑論登第後歸序夏四月馬邑苑言揚告歸
荆衡群公追餞於灞陵列筵而觴送遠之賦珪璋交映
按論字言揚

親昵竝集

曹子建送應氏詩親昵竝集送置酒此河陽

六卿郊餞

左昭十六年晉韓起聘於鄭鄭六卿餞宣子於郊

百官班餞

唐李光顏復還忠武宰相百官班餞帝御通化門臨送
又張柬之授襄州刺史中宗為賦詩祖道又詔群臣餞
送定鼎門外

送羊祜出界

世說郭奕字大業為野王令羊祜常過之奕嘆曰羊叔
子何必減郭大業少選復往又嘆曰羊叔子去人遠矣

遂追送祜出界數百里奕坐此免官

送柳淳入關

孟郊送柳淳入關詩青山輾為塵白日無閒人自古推
高車爭利入西秦王門與侯門待富不待貧空齋一束
書獨去誰相親

送不出門

見內外兄弟

送不越閭

劉宋何尚之字彥德為吏部郎告休定省傾朝送別其父叔度曰此是送吏部郎耳非關何彥德也

愁顏痛骨

孟郊長安留別李觀韓愈因獻張徐州詩富別愁在顏
貧別痛銷骨古樹春無花子規啼有血故人韓與李逸
翰雙皎潔哀我摧折歸贈詞縱橫設

苦心酸肝

白居易生別離詞食蘖不易食梅難蘖能苦兮梅能酸

未如生別之為難苦在心兮酸在肝

一身去國

柳子厚別弟宗一詩零落殘魂倍黯然雙垂別淚越江
邊一身去國六千里萬死投荒十二年桂嶺瘴來雲似
墨洞庭春盡水如天欲知此後相思夢長在荆門郢樹
煙

千里分岐

柳子厚別劉夢得詩去國十年同赴召湘江千里又分

岐

何異登仙

唐玄宗開元四年班景倩自揚州採訪使入為大理少卿過大梁倪若水時為汴州刺史餞之望其行塵久之謂官屬曰班生此行何異登仙

何以贈我

王猛將行造慕容垂飲酒從容謂垂曰今當遠別何以贈我使我覩物思人

懸渴

藝文千里懸渴懸渴喻思人欲見之切也

緘愁

唐詩空留錦字表心素至今緘愁不忍窺凡人寄書而言相思之苦謂之緘愁

仗劍

唐陸龜蒙別離詩丈夫非無淚不洒離別間仗劍對樽酒恥為遊子顏蝮蛇一螫手壯士疾解腕所思在功名

離別何足嘆

着鞭

事理發揮慷慨丈夫意氣相期仗劍於樽酒之間着鞭
於功名之會惟知以懷安敗名為戒夫豈歔歔流涕戀
戀作兒女子態耶

東門祖餞

見致仕

南京送別

蘇東坡出知杭州道由南京陳後山時為徐州教授告
徐守孫覺願往一見而覺不之許乃託疾謁告來南京
送別同舟東下至宿而後歸為劉安世所彈

揮袂

文選分塗長林側揮袂萬始亭又唐詩岐路分襟易

牽衣

魏文帝見挽船者兄弟辭別作詩曰舍我故鄉客將適
萬里道妻子牽衣袂落淚沾懷抱

行色

柳下季謂孔子曰今者闕然數日不見車馬有行色得
微見跖耶孔子仰天而嘆曰然出莊子

羈心

唐詩羈心何處盡羈心謂羈客之心也

墜雨

文選墜雨離於雲秋蒂去於樹喻別離也

別雲

唐詩離愁慘別雲

岐言

六朝詩岐言未及申謂將別時臨岐所言也

別引

唐詩別引繞繁絃別引謂離別之歌曲也

扶景柳烟

六朝詩君如東扶景妾似西柳烟此喻夫婦離別一在東一在西相隔之遠也一說東扶景日初出也喻人之

芳年西柳烟暮景也喻人之年老

迷雀羈雉

六朝詩西飛迷雀東羈雉倡樓秦女年相隨此喻夫婦離別不得相隨也


旅鬢

唐詩清露下時傷旅鬢

離聲

宋胡直孺字少汲別劉邦直詩我無健筆翻三峽君有

長才肅五兵同是行人更分手不堪風樹作離聲又唐
李白南陽送客詩坐惜故人去偏令遊子傷離顏怨芳
草春思結垂楊



山堂肆考卷一百三十七